



2 Drypfuscher

syt: 1950

Sujet: Hesch hytte dy Kredit scho ghaa ?

Gläbbere gheersch's im Bletterwald.
E Grycht goot umme : „Glaubet draa,
die gueti Zyt isch umme – bald!
Hesch hytte dy Kredit scho ghaa?

Es kunnt e e mächtig, myysi Gryyse,
gryzt hailig Schwizer-Wiirtschafts-Ruum,
pletzlig styggt d' Konjunggduur in d'Yyse,
und alli zämme luege dumm.
Ebb Bangge, Beerse ooder Immo-
byllie, es kunnt jetzt alles draa.
ebb Groos, ebb Glai, s'isch halt eso...
Hesch hytte dy Kredit scho ghaa?

Scho mänge Truubel, het's gää und khaa,
scho vyyly, vyyly, vyyli Mool,
ebb Strytt, Grieg, Phescht und Cholera,
doch immer no git's Aigegool !
So kunnt's , ebbe alli 30 Jeerli ,wirdsch zem Gfreerli,
d'Wiirtschaft drepflet, wie uss verkalggte Reerli,
muesch du als Glaine, zittere und gwaggele,
kasch's nimm breschtiere, halt uff s' Sozialamt daggele

Und ! Was au no nie verstuunt het, Dinge !
E Hampfle Ryychi hän(au wenn scho alles isch am A..)
yyri Scheefli kenne in's Droggene yyne bringe...
Hesch hytte dy Kredit scho ghaa?

Und drnoo, wie allewyy, kai Sau isch d'schuld,
kai Lingge, kaini Rächte.
E Baar wo dä Mischt zem dampfe brocht hän,
sin scho in dr Ränte.

Dr Bundesroot spiilt „Robin Hood“, verkundet :
nur si syge die Ächte!
mit Rettigsphäggli und „Fleur de mer“...!
Y glaub, y haa ain in dr Brännte!

Und wääreli wäär isch dr Sydebogg?
Wäär nämme myr jetzt draa?
Wäär isch uff's Wiirtschafts –Schlyychli ghoggt?
Hesch hytte dy Kredyt scho ghaa?

Ganz aifach, s'isch wie allewyy,
dr Georgi Dabbelyouu....
doch halt, däa gits jo numme grad 8 Joor !?
Und jetzt kunsch wiider duu!

Aim Globi ganz elai, kasch doch das grooos Desaschter
nit zuegeschtoo, das wäär jo bleed,
Das kaa's jo gaar nit syy! Doch welle het däa Zaschter,
em Änd vernichtet , ganz „kongreed“?
Myr wisse's nit und Gschneer git's gnueg,
vermuettlig isch vo allem Zyyg, e biirebitzli draa,
Wäär nimmi kaa , dä nimmt sy Huet,
und hett halt sy Kredit scho ghaa.

Fyr alli, wo Alternative sueche, was me mit de voorige Aggzie au no kennti aastelle, die drille däa Faggel !

As de zem Griible uuse kunsch, biete myr Usswyychmeegligkaite aa.Eem Fasnachts-Zyschdyg, d' Ladäärne uff em Minschterblatz ooder bi dr Kasäärne im Glaibasel, d' Waageusstellig . Offe vom Moorge em 11 bis Zoobe em 12.

